

## Kolosi

Yesu pi wel wiak kutömweri sêen wê krismaki 32 pöta ök won sêen Pool pi Rom kak wii kaatak wê pep epwer retëng äak Tikikasre Onisimas piarip mangkën wak sê Kolosi kakë ingre mor saurö mena. Pim retëng äauta songönte epël. Pool pi ngönën ya yamëngkautaan wii kaatak moulmëen wëen Epapras pim naë sê omën naröak Kolosi ingre moröröen ngönën kaaröt mëea pöt ök mëea. Pitëm ngönën kaar pöt epël. Anuture omnaröa tekrak tiarim yaya mapenaarö wê. Nent, Yesu pi Anutuu ök won, enselöröa ököp. Ën nent pöt, kaömp nant ngës olëak wëaare koröp kaut yailaut ngön pöt ök maan kat wiak Poolök ngön kaar pöt tekeri wasëpënëak retëng ë mena.

### **Pöt epël wia.**

Ngön ngës rëaut *1:1-8*

Kristoë wëwëetere ya yamëngkaut *1:9-2:19*

Kristook yal menak wëauta ngönte *2:20-4:6*

Ngön mëët *4:7-18*

<sup>1-2</sup> O Anutuu omnarö, Kristo pim kentöökë ënëm ëeim Kolosi kak wëaurö ne Pool Anutuu këmtak Yesu Kristoë ngön yaaö omën nampök Timoti tiarim karip piiring wê pep epwer retëng ë yangk.

Anutu tiarim Pepap pim komre kolap pöt ningkën arim naë wiaap.

*Pool pi Kolosi omnaröaan Anutuun yoöre ërëp mëea*

<sup>3</sup> Tenpim akun ël epotë Anutuun arimëen kimang yamëëautë Anutu, tiarim Aköp Yesu Kristoë Pepapön, yoöre ërëp maim wë. <sup>4</sup> Pöt Epapras puuk ar Kristook yal ëak wë kön wi kosang mowasöore Anutuu omën pourö lup sant elmë pël yaauta ngönte ök niaan kat yawi pötaanök. <sup>5</sup> Ngön yaapët, ngön ompyaö pöt, wet rëak arim naë yaaröön ar omën ompyaut kutömweri arimëen yaö ëa pöta ngönte kat wiaurö. Pötaanök ar kön kosang wiak omën ompyaö arimëen kutömweri yaö ëa pötön kor wë pötaan kön wi kosang wasöore lup sant elmë pël yaaurö. <sup>6</sup> Anutuu ngön ompyaö pöt wet rëak arim naë oröön kat wiak pim komre kolap pöta songönte këëkë ewat san akun pötak ngës rëak ngaarëk wëen arim naë ulöl sa. Pël yaëen yang muntatëeröa naëëta tapël ngaarëk yeön ulöl së yes. <sup>7</sup> Ngön ompyaö pöt, Epapras, tenpim kar panëep, neering Kristoë inëen yaalmë pöpök rë nuulon kat wian. Puuk nem urtak Kristo pim yaat këëkë wesak yamëngk. <sup>8</sup> Pi tapöpök Ngëëngk Pulöök arim naë lup sant yaaut tekeri wes nina pöten tenipön ök yenia.

*Poolpi Kolosi omnaröaan Anutuun kimang mëëa*

<sup>9</sup> Pël yenia pötaanök tenip ngön pöt kat wia akun pötak ngës rëak Ngëëngk Pulöök arim lupre könöt kaö nuwasën Anutuu arim ëënëak kön yawi pöten ewat panë sënëëtaan kimang maim wë. <sup>10</sup> Pël ëen ar Aköpë kan pet yaalni pöök yok pangk yesën pi itenak ërëpsawi ëëpnaat. Pël yaëen arim naë këët oröön omën ompyaö ke nentere nent yeem Anutuu yaauten këëkë ewat sëen ewat pöt kaö sëpnaat. <sup>11</sup> Tenip ar ërëpsawiarung ya wiap wëëre lup

kosang wë pël ëënëak Anutuuk pim weëre kosang kaö panëetak weëre kosang nimpnaataan kimang maim wë. <sup>12</sup> Pël maimeë Pep ar kaamök elniin pim omnaröaan yaö niwesaut, ëwaatak wia pöt, tenring öpenaataan yoöre ërëp maim wë. <sup>13</sup> Anutu pi tiar kouta öngpökaan nuwak pim Ru panëepë wa ngaöök yanimë pöta öngpök niulëen wë. <sup>14</sup> Pim Ru pöpök utpetetakaan ent ë niulëak tiarim utpetat won wes nuulëa.

*Kristo pim wëwëetere ya yamëngkaut*

<sup>15</sup> Kristo pi Anutu itnaangkanëpë ököp. Pi ngaanëer omnant won wiaan wakaimaupök peene pötë kaö sak wë. <sup>16</sup> Anutuu Ruup pi kutömweriaan yangerakë omën ël epot pout ket ë pet iraup. Omën tiarim ityaangkautre itnaangkënöt, weëre kosangring kutömweriire mopöök wëaurö, isaare irëa pourö ket ëa. Anutuuk moulmëen Kristo pi omën ël epot poutë pep sak öpënëak ket ëa. <sup>17</sup> Pi omën pout won wiaan wakaimaup. Pim weëre kosangöök elmëaan omnant pout neenem urötë wë. <sup>18</sup> Pi ingre mor saurö tiarim kepön sak wë. Pël ëen ingre mor saurö tiar pim möönre koröpö pël yaë. Pimënt tapöpök ingre mor saurö tiarim songönte. Puuk omën poutë kepön erën elniak öpënëak weletakaan ngës rëak wal ëa. <sup>19</sup> Pöt Anutu pim kentöök pimtë wëwëere weëre kosang pout yang elmëen wak wë. <sup>20</sup> Pël yaëen Anutu pi pim Ruupön maan omën ël epot pout kutömweriaan yangerakë, piiring lup kopëtemer sak öpënëak kön wia. Pël ëëpënëak pim Ruup këra yetaprak möön iit il ngentiin pötak mayaap pöt tekeri wes nina.

21 Ar pöt, ngaanëer Anutu nerek wëen ar nerek wë omën utpetat ëimeë piin kööre tok elmëeimauro. 22 Pël ëauröak Kristo pim koröpre mësëpring oröak wel wia pötak ar wiap nuwasën peene Anutu piiring wë. Puuk arim ketre saunat won nuwasën lup kölam wëen Anutuu ëöetak niulëepënëak pël ëa. 23 Pötaanök ar kön wi kosang yewesautak weë panë sak tauaan omën nantök wer nuön kön wi kosang yewesaut këlok sëpanëen ngönën rë nuula pöt taë wes wak ön. Pool ne ngön ompyaö piptaan ya omën saup. Ngön ompyaö pöt tenök ar yang ël epotëeröen ök niaim.

*Pool pi Kolosi omën ingre mor saurö kaamök elmëa*

24 Nem arimëen këlangön kat yawi eptaan ya kë yes. Kristo pim ingre mor saurö, tiar pim möönre koröp wak wë pöröaan këlangön kat wia. Pöta ök neenta arimëen këlangön kat wiima nant om wia. Pötaanök ar ingre mor saurö kaamök elniak këlangön om wia pöt kat wi pet irumaaten kent yaë. 25 Anutu pim ngönte tekeri panë wesak ök niamëak ingre mor sauröa ya omën neulëaup. 26 Pim ngön epët, ngaanëer ëlëëp wiaan tiarim ëere köröörö kat nawiin wë aprö imautak peeneek pim omnarö tiar tekeri wes yaningk. 27 Anutuuk pim omnarö tiarën ngön ëlëëp ompyaö panëët, omën ngönën kopëlörö arim naë wia pöt, tekeri wes nimpënëak kent yaë. Pöt epët. Kristo pi arring wë. Pötaanök ar piin kor wëen puuk nukoirak kutömweri së piiring önëët. 28 Pötaanök tenök Kristo pim songönte omën pouröen tekeri wesak niaim. Pël eimeë utpet yaaut kasëng mampunëak

pepanöm niaöre ewatring wë rë nuulëeim. Ar Kristoë ök sak önëek yakök yaalni. <sup>29</sup> Ne ar pël ëënëak pim weëre kosang kaöat yenangk pötring weë yengenti.

## 2

### *Kön wi kosang wesak wë ngön kaaröt ke ur olapa*

<sup>1</sup> Ne ar omën epotön ewat sënëak kent kön yawierek kat wieë. Arre ingre mor sa Leotisia kak wëauröere omën ingre mor sa muntneen itnaangkën naröaanta weë ngentiak ya kaöyamëngk. <sup>2</sup> Ne ar lup kopëtemer sak neneren lup sant elmëë lup kosang sëere kön këekë wieë kön wi kosang wasö pël ëënëak weë yengenti. Ar pël ëënë pötak Anutu pim ngön ëlëöp wiakaima pöta songönten ewat sënëët. Pöta songönte Kristo. <sup>3</sup> Pi kön tektekre ewat pepap yak omën poutë songönöt ewat wë. <sup>4</sup> Nem pël yeniak pöt, omën naröak ngön kaar niak wiap nuwaspanëak ngön pipët ök yeniak. <sup>5</sup> Nem yeniak pöta songönte epël. Nem koröpöök maimerek wë, ën lupmer pöt arring wë. Pël ëë arën itaangkën arim lup kopëtemer sak wë wotpil yaautre Kristoon kön wi kosang yewesaut taë wia pöten ërëpsawi yeë.

### *Kristook yal ëak wëwë kosangët öpa*

<sup>6</sup> Ar Aköp Yesu Kristo wan pöl piik yal menak weë. <sup>7</sup> Pël ëak piik misën il tëak pim weëre kosangöök kosang sak wë kön wi kosang yewesauta kan ök niak rë nuula pöök pëen wë kaö wesak yaya maim weë.

<sup>8</sup> Omën naröak ngön kaar mos kë wonöt ök niaan kat wiin pötök wii nitëëpanëen këekë ngarangk

äak weë. Pöt Kristo pim naëaan wonöt, ëaröa ngön pas yangerakë pëenöt. <sup>9</sup> Ar ewat wë. Anutuuk wëwëere weëre kosang pout Kristoë koröpöök pangk äak wakaima. <sup>10</sup> Pël ëaap piik yal äak wë pim wëwëet wak omën nenten ap newasngan. Pi isaup, omën isauröa keponöököp. <sup>11</sup> Ar pöt, Yuta omnaröa yaaul Anutuun yaö ëënëak koröp kaut nailën ëauröak wëwë utpetat kasëng menak Kristoë naë rë olëak piik yal menak wëen puuk koröp kaut yail pöl elniak Anutuun yaö niwasën wë. <sup>12</sup> Arim i yanimë piptak Kristook yal äak wel wiin piiring yang kel niweera. Ën i yanimë taptak Anutu pim weëre kosangöök Kristo weletakaan wal ë moulmëa pöpök ar pim weëre kosangöön kön wi kosang yewasën Kristooring wal ë nuulëa. <sup>13</sup> Ngönën köpël wakaimaurö, ar ngaanëer arim lupötë Anutuun yaö naën wëwë ngaantakël wë utpetat eimaurö. Pël ëen pötök lupöt mën wel niwia. Pël ëautak peene pöt, Anutuuk elniin Kristooring wëwëetak wë. Pël yaëen pi tiarim utpetat ent ë yanuula. <sup>14</sup> Tiar Moses pim ngön kosangötë ngön wia pöt ngaarëk naön wëen pötök utpet kangut tiarim naë orööpnaat, pël ëa. Pël ëautak Anutuuk utpet kang pöt kërë olëa. Kristo pim këra yetaparak möön wel wia pötak Anutuuk kang pöt won wesa. <sup>15</sup> Kristoë këra yetaparak isa pötak Anutuuk kutömweriaan mopöök omën utpet isaare weëre kosangringörö il mowesak pitëm weëre kosangöt ent ë moolëak omnaröa ëöetak pitëm songönöt tekeri wesa.

*Tiar Kristooring wel wiaurö*

<sup>16</sup> Tiar Moses pim ngön kosangötë öngpök naön. Pötaanök omën nampök arim iire kaömp yena pötaanre krismaki ma ngoon ma sant pötë öngpök akun nent ngëengk newasën yeë pötaan utpet wesak niaan pöt kat mowiinganok. <sup>17</sup> Omën pipotön ököököt pël apenaat. Këet orööpënëak yaëen wet rëak oröaut. Peene kë panë pöp, Kristo, pimënt oröak wë. <sup>18</sup> Omën naröak arimtën wak irëak enselöröen yaya manëak kaar yenia pipot kat mowiingan. Pit omën pipotön wangerötë itena pël niak köntak ieping eimeë yangerakë kentöökë ënëm yaë. <sup>19</sup> Omën ke pilörö Kristook yal naën wë. Pi tiarim kepönö, ën ingre mor saurö tiar pim möönre koröpö. Kepönöök möönre koröpö kaamök elniin urötre kosatring yal ëen pangk yaë. Pël ëaan Anutuuk weëre kosangöt yaningkën kaö yes.

<sup>20</sup> Ar Kristooring wel wiin yangerakë omnantë öngpökaan ent ë nuulëauröak tol ëen yang omnaröa yaaul yeë? Tol ëen ngön kosang ke epot ngaarëk yeö? <sup>21</sup> “Epot mor öngan.” “Epot nëngan.” “Epot mësël ëëngan.” <sup>22</sup> Ngön kosang pipotök tiarim yangerakë omnant wak wëen lëngë yes pötön ya. Ngön kosang pipot omnaröa könöökäänöt Mosesë ngön kosangötë yal yemangk, Anutuu naëaan wonöt. <sup>23</sup> Ngön kosang pipotök enselöröen yaya maimeë arimtën wak irëak arim möönre koröpötön nga elmëënëak yenia. Pël yaalni pipotön omën naröak kön wiin ompyaö yaë pël yewas. Pël yaëetak pötök koröpöökë kentre kaur pöt pangk kan newariipan.

*Anutuuk tiar Kristooring weletakaan wal ë nu-  
ulëaurö*

<sup>1</sup> Ar Kristoë wal äutak yal äak piiring wë. Pötaanök omën këët o kutömweri Anutuu yaap-këetakël, Kristoë kaö sak wë pörek wia pötön war kön wieë. <sup>2</sup> Ar yangerakë omnantön kön wiinganok, kutömweri wia pötön kön wieim ön. <sup>3</sup> Pöt Kristoë wel wiautak ar yal äak wel wiin arim wëwëat Kristooring Anutuu naë ëlëëp wiin wia pötaanök. <sup>4</sup> Ënëmak Kristo wëwë pepap pim orö tekeri sëpna akunetak arta piiring Anutuu ëwaatak orö rëenëët.

*Lup ngaanöt sëp wesak lup ngolöpöt öpa*

<sup>5</sup> Pötaanök koröpöökë kent arim yeë pipot sasa kasëng meneë. Pöt epot. Öngre omp nga yaaö, lup kewilring yaaö, öngre omp neneraan kentre kaur yaaö, omën muntaröa omnantön war yaaut. Omën muntaröa omnantëën war yaaö pötak Anutuu urtak yangerakë omnantön omp ak yewas. <sup>6</sup> Omën Anutuu ngön wa olëak utpet pipot yaaö piporö puuk kangut mampnaat. <sup>7</sup> Arta ngaanëër omën ke pilöröaring wë pitëm yaaul eim wakaimaurö. <sup>8</sup> Pël ëauröak peene pöt, ngaare ya sangën, kön utpet mowiire ökre wasre koö ngön, utpet pipot sëp weseë. <sup>9</sup> Ar neneren kaar mangan. Lup ngaanötë utpet yaaut ent ë olëak <sup>10</sup> lup ngolöpöt wak wë pötaanök. Anutuuk lup ngolöp pöt ket äak nina. Pël äak ket elniaupök kët ël epotë könöt ngolöp nuwasën könring sak pimtë ök seim wë. <sup>11</sup> Wëwë ngolöp eptak tiarim kom äak wakaima pöt won yes. Yuta omnaröere muntarö, koröp kaut yailauröere nailën yaaurö, ewatöröere köpëlörö,



inëen yaauröere inëen naënörö, pöt pout mosöt pël yaë. Ën Kristo tiar pouröa kaö sak tiarim lupötë wë pötakëer këet pël yaë.

*Neneraan lup sant elmëëpa*

<sup>12</sup> Anutuuk ar pimëen yaö nuwasën pim omën sak wëen lup sant yaalni. Pötaanök omnaröen yaköm kön wieë kaamök ëere sant elmë, arimtën kön wiin wak iraöre ya wiap ë, omnaröak utpet yaalniin kangiiir nga naalmëen ë pël ëëë.

<sup>13</sup> Naröak könöm nant elniin pöt wak weë. Ën arim tekrakaan nampök utpet elniin pimëen ngön wieë pöt kangiiir elmëënganëp om pim utpet pöt won wes moolaë. Kristook arim utpetat won wes nuulëa pöl arta ëëë. <sup>14</sup> Lup sant yaaö pötak omën ompyaö muntat il yewas. Pël ëak pötak ulöp urak ëen pangk yaë. Pötaanök omën ompyaö pipot yeem lup sant pötaring weë. <sup>15</sup> Pël ëen Kristook mayaap yaningk. Pötak arim lupöt wotpil wesak ompyaö yeë ma won pöt pet elniip. Anutuuk ar möönre koröp kopëtaö wak lup kopëtemer sak mayaaptaring önëak yas niia. Pötaanök këet ël epotë piin yoöre ërëp maim weë. <sup>16</sup> Kristo pim ngönte arim lupötë ilëak kaö sëp. Ar ëwat wë. Neneren rë moulööre utpet yaaut kasëng mampënaan pepanöm maö pël ëëë. Arim lupötök Anutuun yoöre ërëp elmëak ngönën tanre Pulöök elniin Anutuun yaya tan aö pël ëëë. <sup>17</sup> Anutu Pepen Aköp Yesu tiarimëen elnia pötaan yoöre ërëp maimeë omën këmtak aöre moresök ya mëmpö pël yeë pipot Yesuun wesak ëëë.

*Ëlre pepere rungaaröa ngönte*

18 Öngörö, arim ompöröaan inëen elmëeë. Aköpëen yaö saurö, ar pël ëen ompyaö ëëpnaat. 19 Ompörö arta, arim öngöröen nga elmëëngan, lup sant elmëeë. 20 Rungaarö ar, arim ëlre peparöa ngön ngaarëk weë. Pël yaëen Anutuuk itaangkën pangk ëëpnaat. 21 Ën peparö arta, arim rungaarö ya utpet ëëpanëen ya sangën mongawisngan.

*Inëen yaäore ngarangköröa ngönte*

22 Inëenörö ar, kët ël epotë arim ngarangköröa ngön ngaarëk weë. Arim ngarangköröak itaangkën ompyaö ëëpnaataan pëen won, Aköpön kasinkasin yeem weë ngentiak pitëm ngön ngaarëk weë. 23 Arim ya yamëngk pipot pout omnaröaan won, Anutuun yeë. Pötaanök weë panë ngentiak mëneë. 24 Ar ewat wë. Aköpök kangut nimpnaat. Puuk ar pim omnaröaan yaö ëa pöt ningkën önëet. Pöt ar Aköp Kristo pim inëen yaalmë pötaanök. 25 Ën omën utpet yaë pipop Anutuuk pim utpet yaë pöta kangut mampnaap. Anutu pim ngön yaatak omën yapinringre yapin won pourö mööngkraar kangk naalniipan

## 4

1 Ngarangkörö ar, wotpil wesak arim inëenörö mëngkre mëngk ngarangk elmëeë. Pöt arta arim wotöököp kutömweri wë arën itena pël weseë.

*Kimangyamëëautere ompyaö wëauta ngönte*

2 Ar pourö kosang wesak Anutuun ök maim ön. Pël eimeë ök yamëëautak Anutuun këëkë kön wiak yoöre ërëp maim ön. 3 Pël ëak arim ök yamëëautak tenimëenta Anutuun kimang maim ön. Pi kan nent koir ningkën pim ngönte ök

mëak Kristoë ngön ngaan ëlëëp wiakaima pöt ök menaan kimang maim ön. Ne ngön pöt ök yamëëautaan wii kaatak wë. <sup>4</sup> Kimang maim önë pötak kaamök elnëaan nem ëëmëak neea pöl ngön ëlëëp wiakaimauta songönte wa kotiak ök memaat.

<sup>5</sup> Ngönën kat nawiin wilëngkëël wëaurö pitring wë akun il wasnganëën omnant këékë kön wieëak ëën. <sup>6</sup> Arim ngönöt ompyaö pan misëngring to-munatë ök ëëp. Pël wë omnaröen ngön kaip ti mampunëëtaan poprak naën ëënëët.

*Poolök Tikikasre Onisimas wes mëa*

<sup>7</sup> Nem wë pöta ngönte Tikikas puuk waisak ök niapnaat. Pi nem kar panëëpök Aköpë ya omën ompyaup, neering ya ngawi yamëngkaup. <sup>8</sup> Ten tolëël wë pöta ngönte ök niaan kat wiak lup kosang sënëak nook wes mëën yewais. <sup>9</sup> Pël ëak Onisimas, tiarim kar panëëp, piiring wes mëën yewais. Pi arim kakaanëp ya sëp newasën om wëaup. Pi-aripök eprekë yaaut ök niapnaat.

*Pool pi Kolosi omnaröen yoöre ërëp mëëa*

<sup>10</sup> Aristakas neering wii kaatak wëaupök arën yoöre ërëp yenia. Ën Maak, Panapas pim nang karip, puukta tapël yenia. Pi arim naë waisën pöt nem niak pöl sant mowasën. <sup>11</sup> Ën Yesu, yapin nent Sastas, piita arën yoöre ërëp yenia. Yuta omën nem karuröa naëaan pitökëër ketumön newesak omnarö Anutuuk wa ngaöök mëëpënëak neering ya yamëngk. <sup>12</sup> Pël ëak arim kakaanëp, Epapras, Yesu Kristoë ya omnamp, puukta yoöre ërëp yenia. Ar kosang sak Anutuu arim ëënëak yaalni pöt kön wi sokolön yak kët ël epotë kosang wesak

kimang maim wë. <sup>13</sup> Pim songönten nem ewat wë yeniak epop. Pi arimëenre Leotisiaare Irapolis ka pöteparë omnaröaan kaamök elniipënëak ya kaö yamëngkaup. <sup>14</sup> Luk root ompyaupre Timas pi-aripta yoöre ërëp yenia. <sup>15</sup> Ne tiarim kar Leotisia kak wëauröen yoöre ërëp yemak pël ök man. Pël ëak öng Nimpaare pim kaatak ngönënëen wa top yauröenta tapël man. <sup>16</sup> Pep epwer ar sangk kelak pöt wes mëen Leotisia ingre mor saurö pitta sangk kelëp. Ën kangiir Leotisia omnarö menan pöwer pit sangk kelak ningkën arta sangk kelën. <sup>17</sup> Pël ëak Akipas pipopön, “Aköpë ya nina pipët këëkë wesak mën,” pël man.

<sup>18</sup> Pep epwer omën nampön maan retëng ëa. Ën kaö epët pöt nemtok retëng yeë. Nemtok arimëen yoöre ërëp ngön retëng yeë. Ar ne wii kaatak wë pöt kön wieë nemëen Anutuun kimang maë.

Anutu pim komre kolap pöt arim naë wiaap.

[Yok pi tapët.

Ne arim karip, Pool.]

**NGÖNËN PEPEWER**  
**The New Testament in the Weri Language of Papua**  
**New Guinea**  
**Nupela Testamen long tokples Weri long Niugini**

copyright © 1984 Wycliffe Bible Translators, Inc.

Language: Weri

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 22 Feb 2024 from source files dated 31 Aug 2023

ec1ac06d-1c8c-5be3-8326-dcf0ceacd4c2